

金樓子卷第五

梁孝元皇帝撰

著書篇十

案昭德讀書志金樓子目錄有著書篇永樂大典金樓子聚書篇後有自連山三秋至已上六百七十七卷云云今案其文蓋錄著書篇正文脫其篇目因誤

與聚書合為一篇今分爲六篇大興又別載金樓子著書篇五條其二條與藝文類聚所載梁元帝孝子傳序懷舊志序相出入而首尾殘闕文亦互異知原書具載序論非僅目錄今備考諸書凡可補者悉附於後庶存其大概云

連山三秋三十卷

金樓年在弱冠著此書至於立年其功始就躬親筆削極有其勞

金樓秘訣一秋二十二卷

金樓纂即連雜事無奇也

周易義疏三秋三十卷

金樓奉述制義私小小指意也○案梁書本紀義作講三十卷作十卷

禮雜私記五秋五十卷

十七卷未成

右四件一百三十二卷甲部

注前漢書十二秋一百一十五卷

孝德傳三秋三十卷

金樓合衆家孝子傳成此

忠臣傳三秋三十卷

金樓自為序○案隋書經籍志有顯忠傳三卷梁元帝撰

丹陽尹傳一秋十卷

金樓為尹京時自撰

仙異傳一秋三卷

金樓年少時自撰其書多不經

黃妳

案梁朝有名士呼書卷為黃妳即見本書雜記篇原本黃託王謹校正

自序一秋三卷

金樓小時自撰此書不經

百子全書

金樓子五

全德志一秩一卷

金樓自撰

懷舊志一秩一卷

金樓撰

研神記一秩一卷

金樓自為序付劉毀纂次

晉仙傳一秩五卷

金樓使顏協撰○案梁書顏協傳協所撰晉仙傳五篇

繁華傳一秩三卷

金樓使劉緩撰

右一十一件二百一十一卷

乙部案石件僅二百二卷

孝子義疏一秩十卷

奉述制旨并自小小指意○案梁書本紀武帝有老子講疏元帝有老子講疏四卷今自注云奉述制旨則孝字即老子之說義字即講字之說但

卷數不同未敢輒改附識於此

玉韜一秩十卷

金樓出牧渚宮時撰

貢職圖一秩一卷

語對三秩三十卷

同姓同名錄

案梁書本紀作古今同姓名錄

一秩一卷

金樓撰

式苑一秩三卷

金樓自撰○案梁書本紀有式贊三卷苑字疑訛

荆南志一秩二卷

金樓自撰

江州記一秩三卷

奇字二秩二十卷

金樓付蕭貢撰

長州苑記一秩三卷

金樓與劉之亨等撰

玉子訣一秩三卷

金樓付劉緩撰

寶帳仙方一秩三卷

食要一秩十卷

金樓付虞預撰

辨林二秩二十卷

案隋書經籍志辨林二十卷注蕭貞撰

樂方一秩十卷

補闕子一秩十卷

金樓為序付鮑泉東里撰

譜一秩十卷

金樓付王兢撰

夢書一秩十卷

金樓使丁規撰

右一十八件一百六十卷

丙部案石件僅一百五十九卷

安成煬王集一秩四卷

案梁書安成煬王秀子機製封謚曰煬所著詩賦數千言世祖集而序之原本說作煬帝王集係鈔寫訛誤詳護校正又隋書經籍志安成煬王

集五卷

集三秩三十卷

案梁書本紀文集五十卷隋書經籍志作五十二卷又有梁元帝小集十卷疑作此書時方三十卷非說也謹校

碑集十秩百卷

付蘭陵蕭貞撰○案隋書經籍志梁元帝撰雜碑二十卷碑文十五卷此作百卷疑至隋時已失其全謹校

詩英一秩十卷

付卿郡王孝祀撰○案隋書經籍志有詩英九卷注謝靈運集注又云梁十卷不著姓名疑即元帝此書謹校

右四件一百四十四卷丁部

內典博要三秩三十卷

案梁書本紀作一百卷

已上六百七十七卷

夫安親揚名。陳乎三德。立身行道。備乎六行。孝無優劣。能使甘泉自湧。鄰火不焚。地出兼金。天降神女。騰磨自撥。嘯虎還仁。陳弇黃雀之祥。禽兼赤石之瑞。孟仁之笋出林。中華之梓生屋。感通之至良可稱。

余中年承乏。攝牧神州。威里英賢。南冠俊髦。車如流水。俱踵許掾之門。人同連璧。咸登樂尹之館。

老聃貴弱。孔子貴仁。陳駢貴齊。楊朱貴已。而終為令德。

案數語係引呂氏春秋應有缺文

春風秋月。賞心樂事。淨竹節之船。驅桂條之馬。

洛城之前。猶有甄侯之館。案原本金樓子著書篇僅存五條其能使甘泉自湧四語與藝文類聚所載梁元帝孝德傳序同中年承乏八句與藝文類聚所載梁元帝懷舊志序同則著書篇原載各書序論惜割裂不全謹校補數則於後

孝德傳序曰。夫天經地義。聖人不如。原始要終。其踰孝道。能使甘泉自湧。鄰火不焚。地出黃金。天降神女。感通之至。良有可稱。

上忠臣傳表曰。資父事君。實曰嚴敬。求忠出孝。義兼臣子。是以冬溫夏清。盡事君之節。進思將美。懷出奉之義。義軒改物。殷周受命。三能十亂。九棘五臣。靡不夙夜在公。忠為令德。若使緡雲得姓之子。姬昌魯衛之臣。是知禮合君親。孝忠一體。性與率由。因心致極。臣連華霄。漢憑暉日。

月三握再吐。夙奉紫庭之慈。春詩秋禮。早蒙丹宸之訓。宣帝褒德麟閣。畫充國之形。顯宗念功。雲臺圖仲華之象。

忠臣傳序曰。夫天地之大德曰生。聖人之大寶曰位。因生所以盡孝。因位所以立忠。事君事父。資敬之禮。寧異為臣為子。率由之道。斯一忠為令德。竊所景行。且孝子列女。逸民咸有列傳。至於忠臣。曾無述製。今將發篋陳書。備加討論。

忠臣傳諫諍篇序曰。富貴寵榮。人所不能忘也。刑戮流放。人所不能甘也。而士有冒雷霆。犯顏色。吐一言。終知自投鼎鑊。取離刀鋸。而曾不避者。其故何也。蓋傷於茫禹跡。毀於一朝赫赫宗周。滅成禾黍。何者。百世之後。王化漸頽。欽若之信。既盡。解網之仁。已泯。徒以繼體所及。守器攸歸。出則清警傳路。處則憑玉負屨。事無暫舛。意有必從。所謂生於深宮之中。長於婦人之手。未嘗知憂。未嘗知懼。況惑襄人之巧笑。迷陽阿之妙舞。重之以剗削。用之以逋逃。亦有傾天滅地。汙宮瀦社之罪。拔本塞源。裂冠毀冕之釁。於是策名委質。守死不二之臣。以剛腸疾惡之心。確乎貞一之性。不忍見霜露麋鹿。栖於宮寢。麥穗黍離。被於宗廟。故瀝血抽誠。披胸見款。赴焦爛於危年。甘滅亡於昔日。冀桐宮有反道之明。望夷無不言之恨。而九重懸遠。百堆巖絕。丹心莫亮。白刃先指。見之者掩目。聞之者傷心。然後鳴條有不收之魂。商郊致白旗之戮。

忠臣傳死節篇序曰。自非識君臣之大體。鑒生死之宏分。何以能滅七尺之軀。殉一顧之感。然平路康衢。從容之道。進危塗險徑。忠貞之節。興登平路者。易為功。涉險塗者。難為力。從容之用。

世不乏人。忠貞之槩。時難屢有。

丹陽尹傳序曰。傳曰。大夫受郡漢書曰。尹者正也。及其用人。實難斯授。廣漢和顏接下。子高自輔經術。孫寶行嚴霜之誅。袁宏留冬日之愛。自二京板蕩。五馬南渡。固乃上燭天文。下應地理。爾其地勢可得而言。東以赤山為成臯。南以長淮為伊洛。北以鍾山為華阜。西以大江為黃河。既變淮海為神州。亦即丹陽為京尹。雖得人之盛。頗愧前賢。而眇遇之深。多用宰輔。皇上受圖負扆。寶歷惟新。制禮以告成功。作樂以彰治定。豈直四三皇六五帝。孕夏陶周而已哉。若夫位以德敘。德以位成。每念忝蒞京河。茲焉四載。以入安石之門。思勤王之政。坐真長之室。想清談之風。求瘼餘晨。頗多暇景。今綴采英賢。為丹陽尹傳。

全德志序曰。老子言全德歸厚。莊周云全德不刑。呂覽稱全德之人。故以全德創其名也。此志隆大夫為首。伊人有學有辯。不夭不貧。寶劍在前。鼓瑟從後。連環炙輠。雍容卒歲。駟馬高車。優游宴喜。既令公侯踞掌。復使要荒蹶角。入室生光。豈非盛矣。若乃河宗九策。事等神鉤。陽雍雙璧。理歸元感。南陽樊重。高閣連雲。北海公沙。門人成市。咨此八龍。各傳一藝。夾河兩郡。家有萬石。人生行樂。止足為先。但使樽酒不空。坐客恒滿。寧與孟嘗聞琴。承睫淚下。中山聽樂。悲不自禁。同年而語也。

全德志論曰。物我俱忘。無貶廊廟之器。動寂同遣。何累經綸之才。雖坐三槐。不妨家有三徑。但接五侯。不妨門垂五柳。使良園廣宅。面水帶山。饒甘果而足花卉。葆筠篁而玩魚鳥。九月肅霜。

時饗田畷。三春捧觴。乍酬蠶妾。酌斗酒而歌南山。烹羔豚而擊西岳。或出或處。竝以全身為貴。優之游之。咸以忘懷自逸。若此眾君子。可謂得之矣。

懷舊志序曰。吾自北守琅臺。東探禹穴。觀濤廣陵。面金湯之設險。方舟宛委。眺玉筍之干霄。臨水登山。命儔嘯侶。中年承乏。攝牧神州。戚里英賢。南冠髦俊。陰真長之弱柳。觀茂宏之舞鶴。清酒繼進。甘果徐行。長安韋公。為其延譽。扶風長者。刷其羽毛。於是駐伏熊。迴駟原缺一字命鄒湛。召王猷。余顧而言曰。斯榮難常。誠有之矣。日月不居。零露相半。素車白馬。往矣不追。春華秋實。懷哉何已。獨軫魂交。情深宿草。故備書爵里。陳懷舊焉。

職貢圖序曰。竊聞職方氏掌天下之圖。四夷八蠻。七閭九絡。其所由來久矣。漢氏以來。南羌旅距。西域憑陵。創金城。開玉關。絕夜郎。討日逐。觀犀甲則建朱崖。聞蒲萄則通大宛。以德懷遠。異乎是哉。皇帝君臨天下之四十載。垂衣裳而賴兆民。坐巖廊而彰萬國。梯山航海。交臂屈膝。占雲望日。重譯至焉。自塞以西。萬八千里。路之狹者。尺有六寸。高山尋雲。深谷絕景。雪無冬夏。與白雲而共色。冰無早晚。與素石而俱貞。踰空桑而歷昆吾。度青丘而跨丹穴。炎風弱水。不革其心。身熱頭痛。不改其節。故以明珠翠羽之珍。細而弗有。龍文汗血之驥。卻而不乘。凡此乃聖。猶有國人之法。晉帝君臨。實聞樂賢之象。甘泉寫閼氏之形。後宮玩單于之圖。臣以不佞。推轂上游。夷歌成章。胡人遠集。款關蹶角。沿沂荆門。瞻其容貌。訊其風俗。如有來朝京輦。不涉漢南。別加訪採。以廣聞見。名為職貢圖云爾。

案自孝德傳序以下者。俱從藝文類聚增補。

捷對篇十一

夫三端為貴。舌端在焉。四科取士。言語為一。雖謀謀利口。致戒嗇夫。便便為嘲。且聞蕤浪。聊復記言。以觀捷對。

晉武帝受禪。探得一字。朝士失色。裴楷對曰。天得一以清。地得一以寧。侯王得一以為天下貞。宋文帝嘗與羣臣汎天淵池。帝垂綸而釣。回旋良久。竟不得魚。王景文乃越席曰。臣以為垂綸者清。故不獲貪餌。此竝風流間勝。實為美矣。

盧志問陸士衡。陸抗陸遜是卿何物。荅曰。如卿於盧瑛。盧毓相似。

陳大武該問鍾毓曰。臯陶何如人。對曰。君子周而不比。羣而不黨也。

崔正熊詣郡。郡將姓陳。問正熊曰。君去崔杼幾世。荅曰。正熊之去崔杼。如明府之去陳恒也。

安成公何勗與殷元喜共食。元喜即淳之子也。勗曰。益殷尊羹。元喜徐舉頭曰。何無忌諱。勗乃

無忌子。

劉俊勸謝淪酒曰。謝莊兒不得道。不能飲。對曰。苟得其人。自可沈酒。俊乃洒之子。

諸如此類。雖為優。

而荅者為優。

魏文帝受禪。郭淮晚到。帝曰。防風後至。便行太戮。對曰。五帝教民以德。夏后始用刑書。臣在唐虞之世。知免防風之戮。

宋武帝登霸陵。乃眺西京。使傅亮等各詠古詩名句。亮誦王仲宣詩曰。南登霸陵岸。回首望長

安

楊子州

案藝文類聚作楊氏子太平御覽引作梅周誤

年七歲甚聰慧孔永詣其父父不在乃呼兒出為設果有楊梅

永指示兒曰此真君家果兒答曰未聞孔雀是夫子家禽

如此之流竝皆文雅可觀不關得喪也

劉道真常與一人共素拌草中食見一嫗將二兒過竝青衣調之曰青羊將二羔嫗答曰兩猪

共一槽

祖士言與鍾雅相調祖語鍾曰汝潁川之士利如錐鍾答曰卿燕代之人鈍如槌祖曰以我鈍

槌打汝利錐鍾曰吾有神錐祖曰既有神錐亦有神槌

案太平御覽載此段文小異附錄備考祖納謂梅陶及鍾雅曰君汝穎之士利

如錐我幽冀之士鈍如椎持鈍椎捶君利錐皆當推矣陶雅竝稱有神錐不可得推納曰假有神錐必有神椎陶雅無以對

費祿使吳孫權饗之逆敕羣臣使至伏食勿起祿至權為輟食祿嘲之曰鳳凰來朝麒麟吐哺

鈍驢無知伏食如故諸葛瑾輟食反嘲之曰爰植梧桐以待鳳凰有何燕雀自稱來翔何不彈

射使還故鄉

諸如此例合曰能調過為疏鄙也不足多稱

羊戎好為雙聲江夏王設齋使戎鋪舒法坐戎處分曰官教前牀可開八尺江夏曰開牀小狹

戎復唱曰官家恨狹更廣八分文帝與戎對曰金溝清池銅池漾洩極佳光景當得劇基

此其滑稽

之雄未足

吳道張溫聘蜀百官皆餞馬秦宓未任諸葛亮累催之溫曰彼何人也亮曰益州學者也及至

溫問宓曰君學乎宓曰五尺童子皆學何必小人溫復問曰天有頭乎宓曰有之溫曰何方安

子

子

金樓子五

一

山

曰詩云乃瞻西顧以此推之頭在西方溫曰天有耳乎宓曰天處高而聽卑詩云鶴鳴九臯聲聞於天若其無耳何以聽之溫曰天有足乎宓曰天步艱難之子不猶若其無足何以步之溫曰天有姓乎宓曰姓劉溫曰何以然也答曰今天子姓劉故以此知之溫曰日生於東乎宓曰雖生於東而沒於西

既學而又辨此其優也

吳紀陟使魏廷問曰吳成幾何曰西陵以至京都五千七百里道里甚遠難以堅守答曰譬如八尺之身其護風寒不過數處裴松之謂不如金城萬雉防之者四門而已

習鑿齒詣釋道安值持鉢趨堂鑿齒乃翔往衆僧之齋也衆皆捨鉢敬衽唯道安食不輟不之禮也習甚恚之乃厲聲曰四海習鑿齒故故來看爾道安應曰彌天釋道安無暇得相看習愈忿曰頭有鉢上色鉢無頭上毛道安曰面有匙上色匙無面上毛習面也習又曰大鵬從南來衆鳥皆戢翼何物凍老鷄脯脯低頭食道安曰微風入幽谷安能動大材猛虎當道食不覺蚤蚤來於是習無以對

案太平御覽載此事曰釋道安後辨有高才自北至荊州與習鑿齒初相見道安曰彌天釋道安鑿齒曰四海習鑿齒

志怪篇十二

夫耳目之外無有怪者余以為不然也水至寒而有溫泉之熱火至熱而有蕭丘之寒重者應沈而有浮石之山輕者當浮而有沈羽之水淳于能剖臚以理腦元化能剝腹以浣胃養由拂蜻蛉之左翅燕丹使衆雞之夜鳴皆其例矣謂夏必長而薺麥枯焉謂冬必死而竹柏茂焉謂始必終而天地無窮焉謂生必死而龜蛇長存焉若謂受氣者皆有一定則雉有化蜃產之為

蛤壤蟲反翼。川鼃奮蜚。鼠化為鴛。草死為螢。人化為虎。蛇化為龍。其不然乎。及其乾雀知來。狸
狸識往。太皞師蜘蛛而結罟。金天據九扈以為政。軒轅候鳳鳴而調律。唐堯觀蓂莢以候時。此
又未必劣於人也。逍遙國葱變而為韭。壯武縣桑化而為柏。汝南之竹變而為蛇。茵郁之藤化
而為鮪。盧耽為侍中。化為雙白鵲。王喬為鄴令。變作兩飛鳥。諒以多矣。故作志怪篇。

秦青謂友人曰。韓娥東之齊。至雍門鬻歌。既而餘響繞梁。三日不絕。遇逆旅人辱之。娥因舉聲
哀哭。一哭老少悲愁。三日不食。娥復舉聲長歌。一里拊舞。不能自禁。忘向之悲也。乃厚賂之。雍

門人至今善歌。

案別卷載金樓子一條其事同其文互異又不著篇名附錄於此以備考薛譚學謳於秦青未窮青之旨於一日遂解歸秦青乃饒於郭憫撫節悲歌聲震林

木響通行雲薛譚乃謝求返然身不敢言歸秦青謂其友曰昔韓娥東之齊匱糧遇雍門鬻歌假食既去而響繞梁三日不絕左右以其人弗去過逆旅逆旅人辱之韓娥因曼聲哀哭一里拊舞能自禁乃厚賂而遣之故雍門之人至今善歌善哭效娥之遺聲

有人以優師獻周穆王。甚巧能作木人。趨走俯仰如人。鎖其頤則可語。捧其手則可舞。王與盛
姬共觀。木人瞋其目。招王左右侍者。王大怒。欲誅優師。優師大怖。乃剖木以示王。皆附會草木
所為。五臟完具。王大悅。乃廢其肝。則目不能瞋。廢其心。則口不能語。廢其脾。則手不能運。王厚
賜之。

周穆王時。西極有化人。能入水火。貫金石。反山川。移城郭。穆王為起中天之臺。鄭衛奏承雲之
樂。月御獻玉衣。日日薦玉食。幻人猶不肯舍。乃攜王至幻人之宮。構以金銀。絡以珠玉。鼻口所
納。皆非人間物也。由是王心厭宮室。幻人易之耳。王大悅。肆志遠遊。

短人在康居國北男女皆長三尺

夫餘國有美珠大如酸棗

海中得一布褐長三丈

天下之大物有北海之蟹舉其螯能加山焉有東海之魚焉有海燕焉一日逢魚頭七日遇魚尾魚產三百里海水如血

大月支及西胡有牛名曰日及今日割取其肉一二斤明日瘡即愈故漢人有至其國者西胡

以此牛示之漢人對曰吾國有蟲大如小指名曰蠶食桑葉而吐絲外國人復不信有蠶

東南有桃都案別卷引此作郁山有大桃樹上有天雞日初出照此桃天雞即鳴天下之雞感之而

鳴樹下有兩鬼對樹持葦索取不祥之鬼食之今人正旦作兩桃梗以索中置雄雞法乎此也

玉之精為白虎金之精為車渠楓脂千歲為琥珀銅之精為奴錫之精為婢松脂千歲為茯苓

大秦國人長十丈小秦國人長八尺一足國人長九寸

女國有橫案別卷作漢池水婦人入浴出則孕若生男子三年即死

神洲之上有不死草似菰苗人已死此草覆之即活秦始皇時大苑中多枉死者有鳥如鳥狀

銜此草墜地以之覆死人即起坐始皇遣問北郭鬼谷先生云東海靈洲上不死之草生瓊田

中

秦始皇問鬼谷先生言因遣徐福入海求金菜玉蔬并一寸甚

金菜玉蔬四字諸本同然其曉何義案此條原本多脫誤謹

據太平御覽校改

秦王遣徐福求桑椹於碧海之中。海中止有扶桑樹。長數千丈。樹兩根同生。更相依倚。是名扶

桑。仙人食其椹。而體作金光。飛騰元宮也。

案原本云求一寸甚尚云難得豈知碧海中有扶桑樹云云謹據太平御覽校改

豫章有石。以水灌之便熱。以鼎置其上。灼食則熟。張茂先博物君子也。雷孔章亦一時之學士也。入洛齋此石以示張。張曰所謂燃石也。余從兄勸為廣州。嘗致數斤。煮食猶須燒之。

余丙申歲婚。初婚之日。風景韶和。未乃覺異。妻至門而疾風大起。折木發屋。無何而飛雪亂下。帷幔皆白。翻灑屋內。莫不編素。乃至垂覆闌瓦。有時飛墜。此亦怪事也。至七日之時。天景恬和。無何雲翳俄而洪濤波流。并溷俱溢。昏曉不分。從叔廣州昌住在西州南門。新婦將還西州。車至廣州門。而廣州殞逝。又怪事也。喪還之日。復大雨霑。車軸折壞。不復得前。爾日天雷震西州。聽事兩柱俱時粉碎。於時莫不戰慄。此又尤為怪也。

荊州亭齋。盛夏之月。無白鳥。余亟寢處於其中。及移餘齋。則聚蚊之聲如雷。數丈之間。如此之異。

或世用。或世不見者。涸澤數百歲。谷之不從。水之不絕者。生慶忌。慶忌狀如人。其長四寸。衣黃冠。乘小馬。以其名呼之。可使千里外。一日反報。

北澤之精。生於魃者。一頭兩身。狀若蛇。以其名呼之。可以取魚鼈。此竝涸水之精也。

齊桓公北征孤竹。未至卑耳之谿。見人長一尺。形具馬。案管子作人物具馬右祛衣而走馬前。左右皆不

見桓公曰。吾事之不濟也。豈有人若此乎。管仲曰。臣聞山神有俞兒。案管子作登山神有俞兒者狀長一尺

而人形。見此霸王之君興。則山神見也。走馬前導之也。祛衣前有水也。右祛衣從石方可涉也。

至卑耳之谿。有贊水者。公乃從右方而涉。既濟水。公拜管仲於馬前曰。仲父聖人也。管仲曰。聖

人先知無形。今已有形。臣非聖人也。善承教爾。

桓公與管仲闔門而謀伐莒。未發而已聞於國。桓公怒。管仲曰。國必有聖人。桓公曰。然有藝蓆。

案呂氏春秋作有執聽竊而上視者必是人也。少頃東郭邱案呂氏春秋作牙至。桓公問曰。子言伐莒也。曰然。公曰。何以

知之。曰。臣視二君之在臺上也。口開而闔是言莒也。舉手而指又當莒也。君有甲兵之色。臣是

以知之也。

山中有寅日稱虞吏者。虎也。稱當路案抱朴子有君字者。狼也。辰日稱雨師者。龍也。知其物。案抱朴子有名字

則不能為害矣。

山精如小兒而獨足。案抱朴子作走向後喜。犯人名蛟。呼之即止。一名熱。案抱朴子有內字六。案抱朴子作亦可兼

呼之。夜在山中見胡人者。銅鐵精也。見秦人者。百歲木也。中夜見火光者。亦久枯木也。

外國方士能咒。能臨淵禹步。龍浮出。有物長數十丈。方士咒之。即縮長數寸。撮取著壺中。輒有

四五。以水口口餘國少雨。患者輒齋此龍往賣之。一龍值金十斤。口口頭置水中。則興雲雨。

巨龜在沙嶼間。背上生樹木如淵島。嘗有商人依其採薪。及作食。龜被灼。熱便還海。於是死者

數十人。

海鵠大如鵠

案太平御覽作如常鵠

班白文亦名文

案太平御覽作交鳥

水鵠大而無尾和鳴如鵠聲在水底

鯨鯢一名海鰐穴居海底鯨入穴則水溢為潮來鯨出穴則水入為潮退鯨鯢既出入有節故

潮水有期

用紫芝煮石石美如芋食之可更調和五味下橘皮葱豉名山之下生葱韭者是古人食石種也故語曰寧得一把五加不用金玉滿車寧得一片地榆不用明月寶珠五加一名金鹽地榆一名玉豉唯此二物可以煮石

有樹名獨根分為二枝其東向一枝是木威樹南向一枝是橄欖樹扶南國今衆香皆共一木根是旃檀節是沈香花是雞舌葉是霍香膠是薰陸

地肺荊州濟江西岸安船處也洪潦常浮不沒故云地肺也其中有人焉居南定縣足骨無節解身有毛卧時更相扶然後能起

晉寧縣境內出大鼠狀如牛土人謂之鼯鼠天時將災則從山出遊吠畎散落其毛悉成小鼠盡耗五稼

利水內有木材元嘉中大水有千餘段木流出斧跡未滅俗曰漢將攻越築城伐木於利水未運之前一夜忽失數千段成為鬼所匿今所流木昔鬼匿之者

柴陽郡山中有巨龜長八九尺下有文字前後足下各躡一龜有時踰山越水咸觀異之

晉時營道令何潛之於縣界得一鳥大如白鷺膝上自然有銅環貫之

有清鹽池鹽正四方廣半寸其形扶疎似石人耕池旁地取池水沃種之去勿回視即生此鹽
太極山有采華之草服之乃通萬里之言

孔子家在魯城北塋中樹以百數皆異種魯人世世無能名者傳言孔子弟子既皆異國之人
各持其國樹來種之孔子塋中至今不生荆棘草木

東平思王冢在東平民相傳言思王歸國後思歸京師後葬其冢上松柏皆西靡是時思王皆
生理所寵幸者其號呼之聲後數十年猶有聞者

脩羊公止於華陰山以道干漢景帝案別卷武帝禮遇之數歲道不可得有詔問脩羊公何能發
語未訖於牀上化為白羊題其脅曰脩羊公謝天子後置石羊於通靈臺上

合浦案原本作蒲今依別卷校改有康頭山山上有一頭鹿額上戴科藤一枝四條直上各長丈許
地鏡經凡出三家有師曠地鏡有白澤地鏡有六甲地鏡三家之經但說珍寶光氣前金樓先

生是嵩高道士多遊名山尋丹砂於石壁上見有古文見照寶物之秘方用以照寶遂獲金玉
凡有樹木之變枝柯南枝枯折者寶在樹南西枝枯折者寶在樹西也

凡藏諸寶忘不知處者以銅盤盛井花水赴所擬地照之見人影者物在下也
入名山牽白犬抱白雞山神大喜芝草及寶玉等自出

案太平御覽引地鏡圖曰夫寶物在城郭丘墟之中樹木為之變視柯偏有折枯是其候也視折枯所向寶有其方凡有金寶常變作積蛇見此輩便腹履履若衣以斷之溺之即得凡藏寶忘不知處以大銅盤盛水著所疑地行照之見人影者物在下也據此則凡有

草木

樹木之變以下三段皆地鏡經之文因其文互異謹錄以備考

有石連理生樹高一尺五寸枝頭葉皆紫時人獻以為瑞

青龍元年五月庚辰芝產於長平之習陽六月甲子許昌典農中郎將充奉以其事聞色丹紫質光耀高尺八寸散為三十六莖枝幹似珊瑚之形

巴蛇食象三歲而出其骨君子服之無心腹之疾

魏明帝時京兆人食噉兼十許人遂大肥不能搖動其父曾作方長史官徙送彼縣令共食之一二年中一鄉為之儉

東海有牛魚形如牛剝其皮實之潮水至則毛起潮水去則毛弭

奇肱國民能為飛車從風遠行至於鹽州傷破其車不以示民十年西風至復使給車遣歸無腹國人長而無腹

甘水之閒有義和國有女子方浴於甘淵

白鹽山山峰洞澈有如水精及其映日光似琥珀胡人和之以供國名為君王鹽亦名玉華

宋曾慥類說作玉華鹽

大月氏國善為蒲萄花葉酒或以根及汁醞之其花似杏而綠蕊碧鬚凡春之時萬頃競發如鸞鳳翼八月中風至吹葉上傷裂有似綾緞故風為蒲萄風亦名裂葉風也

巴陵僧房中木愈翦疾生終南山有木伐之瘡隨合